

Isaac Croes na di dos puesto cu medaya di plata

ORANJESTAD - Bon Dia Aruba a informa den edicion di 11 di september cu dia 10 di september Isaac Croes acompaña pa su coach Alexis Cardenas Acosta a sali rumbo pa Bolivia. Tambe nos a bisa cu nos lo trece e resultadonan na conocimiento di nos lectoran.

Bon Dia Aruba a tuma contacto cu Aruba Judo Bond pa sa con a bay cu Isaac Croes

cu lo mester a competi den e categoria U 21, 55 kilo, dia 13 di september. Un Aruba Judo Bond hopi satisfecho cu e resultado a laga sa cu Isaac a logra medaya di plata. E president di Judo Bond Jaime A. Mata a splica cu nan ta hopi satisfecho cu e di dos luga mirando cu Isaac apenas tin 19 aña y cu e ta topa cu atletanan cu hopi experiencia internacional di 21 aña. E no ta prome medaya internacional di Isaac, na 2013 bou guia di

nos coach local Alberto Thiel, miho conoci como Betto, Isaac a gana medaya di oro na Miami den e categoria di U 18, 55 kilo. Tambe e president a abstene di duna mas informacion tocante e campeonato mes pa duna Isaac mes e oportunidad di conta su experiencia dia cu e bolbe cu lo ta dia 17 di september. Ayera dia 14 di september e delegacion lo biaha pa Bogota Colombia desde Bolivia. Na Colombia e delegacion lo participa na un clinica di dos dia.

Nos a puntra e president si tin mas atleta den preparacion pa competencianan internacional y el a duna e siguiente declaracion. Si, recientemente Jayme Lee Mata cu tin 32 aña y ta den e categoria di 66 kilo, tabata na e campeonato na Rusia hunto cu su coach Fiderd Vis. No tabata tin clasificacion pero si Jayme a obtene punto pa por competi na e Olimpiada di 2016 na Brazil. Desde Hulanda Jayme ta competi den



diferente campeonato internacional. E ta keda cay bou bandera di Aruba, pesar cu e ta biba na Hulanda. Fiderd Vis mes tambe lo mester a competi na Rusia pero lamentablemente el a fractura un dede di pia durante training na Hulanda. Fiderd Vis mes lo sali pa Barcelona Spaña pa sigui un curso di coach cu tin un duracion di tres luna. Manera nos a informa caba, e president ta bisa cu awo Isaac a cuminsa

den e categoria di senior. Den hubenil nos tin dos atleta den preparacion cu ta Brandon Wong y David Tromp. E president a informa cu nan tin un atleta femenino pero e ta lesiona cu ta Emmizira Kelly.

President a finalisa e entrevista felicitando Isaac Croes su coach Alexis y e mayornan cu ta duna un sosten enorme na nan yiu, di cual nan por ta hopi orguyoso. □

